

Ser humano mester ta central den cuidu

ORANJESTAD - Cu un comunidad ta beneficia ora su miembronan ta experencia satisfaccion y un calidad di bida optimal den su trato y cuidu no ta nada nobo. Segun Melva Croes-Yanez, di Fundacion Alzheimer Aruba, e experencia di satisfaccion aki

ta basa riba e 'Teoria di motivacion humano' ("A Theory of Human Motivation") di e psicologo di humanismo Abraham Maslow (1943). Como e fundeshi di su teoria, Maslow ta enfoca riba e necesidadnan y nan meta basico (inconsciente) di un

ser humano den su totalidad, unda motivacion na su turno por determina comportacion. Pues, casi semper, comportacion ta encera motivacion y ta consisti mayoria biaha di aspectonan fisiologico, biologico, cultural y di situacion. Croes-Yanez ta muestra e 5

nivelnan di necesidad humano cu Maslow ta referi na dje, ta encera:

1. Necesidad fisiologico primario
2. Necesidad di seguridad
3. Necesidad social y di amor
4. Reconocimento y baloracion
5. Auto-realizacion/ auto actualisacion

Den su secuencia di e 5 necesidadnan humano Maslow ta enfatisa e nivel di necesidad fisiologico como e prome nivel di necesidad. Cada nivel ta depende di esun prome cun'e p'asina yega na e meta di satisfaccion mas halto den e escala di motivacion pa sacia un of otro necesidad humano.

Abraham Maslow tabata interesa entre otro den e curiosidad humano (un comportacion cu tur hende ta nace cun'e) y e motivacion pa (no) tuma cierto accion(nan) pa logra un meta desea. E idea tabata pa formula un teoria positivo di motivacion, cu e meta pa comprende e diferente nivelnan di necesidad, satisfaccion y reaccion di e ser humano. Cu tempo e teoria aki di Maslow a forma e base pa diferente disciplina basa riba comportacion (conflicto, frustracion, stress, inseguridad, poder, crimen, adiccion, etc.) y salud mental di e ser humano, segun Croes-Yanez. Disciplina cu tambe ta uza e teoria aki ta por ehempel: 'mercadeo' ("advertisement"), forma di maneho di un compania, gobierno, promocion di cultura, turismo, educacion, economia, ensenansa, salud, religion, financia, husticia, Industria di sex. E ta splica en corto, e teoria di Maslow aki ta forma e base den tur comportacion y escogencia di nos necesidadnan, nos ser den bida diario. Den mercadeo, por ehempel, e psicologia di Maslow

ta wordo uza como meta principal pa investiga, evalua y pronostica e necesidadnan, comportacion (=escogencia/ compra di un servicio of producto-X) di un comunidad y asina keda hisa e motivacion di e cumprado pa uza un of mas producto/servicio (tambe productonan no necesario of di calidad inferior).

Un cos ta sigur cu e ser humano semper lo keda existi cu e necesidadnan aki pa por sigui biba. Riba tereno di salud, e concepto di necesidadnan humano di Maslow tambe ta forma base di innovacion den cuidu cu ta den 'full swing' caba na paisnan desaroya cu enfoca riba e ser humano den su totalidad den cuidu (den instituto / cas).

E motibo principal pa un innovacion na unda e ser humano den cuidu mester ta central, tin su reis den e fenomeno explosivo di envehecimento cu mundialmente ta e caso.

Mas despues lo amplia mas riba e concepto aki y lo enfoca riba beneficiacion di e necesidadnan humano como base den cuidu di un persona cu Malesa tipo Alzheimer. Tur esaki den cuadro di e colaboracion entre "Alzheimer Association" di Merca y Fundacion Alzheimer Aruba riba tereno di desaroya proyectonan innovativo pa Aruba.

Publico en general ta cordialmente invita pa asisti na e lectura cu e experto invita den e area di coordinacion di proyectonan special di "Alzheimer Association": Sra. Connie Lucas.

E topico di e lectura aki ta: "PERSON CENTERED DEMENTIA CARE: An Alternative Perspective". E lectura aki ta tuma luga den Aula di Universidad di Aruba. Fecha: diamars 12 di november 2013 y ta di 7:00 pa 9:00 di anochi. Idioma ta Ingles. Entrada ta gratis. □